

Fundacion Rancho cu exposicion “Tempo pa Click” na Biblioteca Nacional



ORANJESTAD – Director di fundacion Rancho, sr. Clifford Rosa a informa cu nan ta biniendo cu un exposicion di potretnan na Biblioteca Nacional Aruba su sede na Oranjestad.

“Tempo pa Click” ta e nomber di e expo aki y su apertura lo tuma luga dialuna 18 di januari venidero pa 6or atardi. Nan ta 34 obra y cada un ta expresa visualmente un aspecto subhetivo y personal di e autor rond di e bario Rancho. Pero tambe cada potret tin un historia. “Pa un exposicion e historia ta loke ta enrikece e exposicion mes”, sr. Rosa a laga sa.

Exposicion

El a bisa cu e dia di apertura

tur e participantenan lo t’ey pa duna nan historia riba cada potret. Di e forma aki nan ta duna contenido riba e trabou cu nan a haci durante 2015, inspira riba e bario tipico y mas bieu cu ta Rancho. Aña pasa –segun sr. Rosa– nan a pasa tres mini documentario. Di cada grupo cu a participa den e proyecto aki a wordo haci un seleccion di su trabou cu lo wordo exhibi den e expo aki.

Un grupo di alrededor di 18 persona entre 7 aña pa 70 aña a participa den e bunita proyecto aki, pero un gran mayoria di nan tabata muchanan y hobencitonan. Cada un di nan a presenta su percepcion personal di Rancho locual tur hende interesa lo por wak nan den e



expo aki. Parti di e trabou aki a wordo presenta na luna di augustus ultimo den e bario mes den e localidad conoci como e “Hanchi Awa”. Sr. Rosa den nomber di fundacion Rancho a gradici tur persona y instancia cu ta haci posibel e realisacion di e proyecto aki, entre nan CEDE Aruba y Biblioteca Nacional. “E echo cu nos a haya chens pa expone den Biblioteca Nacional ta algo

hopi grandi pa fundacion Rancho”, el a declara na Bon Dia Aruba. E ta spera cu e ayudo cu nan a ricibi aña pasa lo por continua e aña aki. Gradicimento y fondo El a bisa cu e fundacion aki semper ta traha pa conservacion y cultura di e bario di Rancho. Tambe riba e parti di conscientisacion cu nan ta bin trahando hopi duro den conhuntito cu Museo Arkeologico Aruba, Museo

Historico y tambe Stichting Monumenten Fonds Aruba. Sra. Yosmar Maduro-Sneek kende ta secretaria di e fundacion aki a gradici pa e sosten cu nan a haya durante existencia di e fundacion. El a laga sa cu nan ta hopi contento cu e desaroyo di e fundacion y di e bario di Rancho. Mientras di su banda, sr. Jerry Franca cu ta un sostenido di e fundacion y un “Ranchero nato”, ta trahando riba e formacion y estructura financiero di e fundacion. Di e forma aki nan por yega na cierto proyecto cu nan kier desaroya den e bario aki. Nan ta proyectonan cu –segun Franca– dificilmente por haya sponsor pa nan, pero e fundacion ta percura di tur forma pa yega na e fondonan necesario. □